


► *Pa conmemorá e fechanan histórico: 12 di Maart, 18 di Maart, 25 di Maart y tambe 9 di Augustus:*

Dianan di Gran Patriotismo Arubano



Pa semper ta prepara, pa cualkier eventualidad, laga nos proclama cu forza: **NOS CONFIANZA y FE GRANDI** cu nos tin den nos pais y patria:

Confianza y fé den su independencia: Su libertad: Cu t'e deseo y ideal di mas grandi, y mas profundo di un pueblo! Di ta: Liber!

Y cu a keda anca den e prome Constitucion di nos Pais Aruba, algo sagrado pa semper ser respeta!

Den kere cu fervor den defende y preserva su soberania, democracia y identidad contra cualkier enemigo!

Y den e deber, e obligacion di nos tur: Di stima y ta leal na nos pais: di respeta y ta orguyoso di su Himno Nacional, su Bandera Estatal y nos

Nacionalidad Arubano: Simbolonan di nos Libertad, Soberania y Identidad!

Y di ta convenci, cu voz di pueblo, ta voz di Dios! Y pesey kere den e deber di tur Arubiano pa respeta e Referendum di 25

di Maart 1977: E arma poderoso di **Derecho** di Autodeterminacion, uza pa nos pueblo soberano Arubano, na unda cu tur claridad, cu e sosten importante di

Nacionnan Uni, e voz di pueblo a resona; dunando su mandato pa definitivamente realiza su independencia, libertad y igualdad!

Y kere y tin confianza den haya e sosten di nos partnernan den Reino, cu cual sinta na mesa, a acorda e "Acuerdo di Diamanta" cu a reconoce y proclama Aruba formalmente pa semper: Pais Liber y Soberano!

Y cu ya for di e fecha tan historico aki, di dia 12 di Maart, di aña 1983, a duna Betico tur derecho di a ser proclama pa tur Arubiano:

Libertador!

Di tin fé y confianza den e Arubiano; pover of rico, di bon curazon; cu semper lo sigui lucha y traha pa mantene y conserva Aruba su libertad y igualdad, pa riba nos isla pa eternidad por

reina husticia, hermandad y paz.

Den garantiza su derecho soberano di autodeterminacion: Su derecho soberano di traha y aproba cu unanimidad su propio Constitucion y leyman, y institui su propio gobernacion manera a sosode tambe; riba e gran dia historico, di libertad, union y

unanimidad: Dia 9 di Augustus 1985:

E dia cu e nacion Arubano, un nacion chikito y hoben, merecedor di respet rond mundo, a keda oficialmente reconocí y funda, cu nos prome Constitucion aproba cu e fuerza nacional unanime, di tur e

digno representantenan di nos pueblo!

Cu Amor pa Dios y Patria! Awe Aruba pa su boluntad, ta un isla, y pa su boluntad y di pueblo, ta un PAIS, cu e fundeshi firme di un nacion y estado liber y soberano!

MHB

Luna di Maart; luna pa demostra nos Patriotismo, Dedicacion y Gratitud inmenso

Pa conmemora y celebra e fechanan di mas historico y patriótico di nos pais. Pa demostra y exige respet pa nos soberania y derecho di autodeterminacion cu cual a realiza e ideal y anhelo di mas grandi di nos pueblo: Di ta Liber!

Na conmemora e tesoronan historico di mas grandi cu a keda como nos herencia, pa nos awor duna nan e balor mereci.

E fecha 18 di Maart 1948 y 1976 cu na 1986; a bira e fecha y dia riba cual Aruba pa prome vez como PAIS reconoci, a celebra su dia nacional di himno y bandera simbolonan di e soberania, libertad, union y identidad di nos pueblo.

Y e fecha 12 di Maart, cu merece di ser celebra como e dia nacional di Aruba su "status aparte": E dia di libertad y independencia, e dia di e

Acuerdo di Diamanta riba cual, no un, pero DOS "status aparte" a keda acorda y realiza pa a garantiza pa semper nos libertad!

Di un "status aparte" temporario, inferior di diez aña den un Reino Hulandes, cu e mesun statuut antigua y obsoleto, pa e "nieuwe rechtsorde" di un "status aparte" superior, privilegia y unico, den un Gemenebest-sui generis di un Reino Hulandes moderniza, internacionaliza cu lazonan bilateral, volkenrechtelijk, estrecho y duradero, garantiza pa un tratado di amistad perpetua; cu si ta respeta libertad, igualdad, democracia: cu si ta respeta soberania, idioma, cultura, nacionalidad y dignidad di cada pais, cada pueblo miembro.

Na unda porfin por reina paz y hermandad entre e paisnan y pueblonan miembro.

GRACIAS na e lucha pa independencia y libertad, cu for di Februari 1972 a keda reanuda cu e prome grito lanza contra e monstruo di un Federacion

y na Augustus e mesun aña, cu e grito pa Independencia, den e Gemenebest sui-generis. GRACIAS na e constante preparacion di pueblo y e debido planificacion di nos politiconan, e aña 1977 a bai culmina den e Referendum di 25 di Maart y di un Augustus scur, p'a rescata, realiza y garantiza pa semper nos libertad, y asina trece porfin tur e claridad tan anhela: GRACIAS na e 21.419 Arubianonan cu no a wordo intimada y cu sin miedo, patrióticamente, dia 25 Maart 1977 a scoge pa libertad! Y asina a kita e mancha mahos y scur cu a cai riba e peticion, firma pa pueblo na 1947, y entrega na La Reina na 1948, pero cu no a ser respeta.

GRACIAS n'e sosten masal di pueblo duna na e acuerdo di diamanta cu mescos cu nos amor pa Aruba no tin nada pa kibre. Ki dia nos lo tin un "Monumento of Plaza Libertad": 25 di Maart 1977, dedica na honor di e 21.419 Patriótanan Arubiano?

Ki dia nos lo tin un "Monumento Independencia": 12 di Maart, dedica na e independencia politico realiza cu e DOS status apartenan acorda, dia 12 di Maart 1983, cu pa semper a garantiza nos Libertad?

Ki dia nos lo tin un "Monumento Constitucion" of di Derecho di Autodeterminacion, dedica n'e prome Constitucion di nos pais aproba unanimamente: Dia 9 di Augustus 1985?

Cu cual e ideal y anhelo di tur pueblo respeta: Su INDEPENDENCIA y LIBERTAD a keda realiza y garantiza?

Y nos lo por tin tambe un dia, un "Monumento of Plaza Papiamento" dedica na nos idioma, tan stima?

MHB